

Terenga 5: Hōtaka 15 – Te Kupu ‘reira’

He Mihi

Tēnā rā koutou kei aku koko tangiwai o ngā marae kāinga, o ngā papa nekenekenga o ngā mātua tūpuna. Tēnā koutou kua piri mai anō ki te whare o Ako.

Hei Mahi Whakarongo

I te rangi nei ka whakarongo tātou ki tētehi o ngā kaiako o te kapa haka o Te Iti Kahurangi me ana whakamārama mō tētehi o ā rātou titonga.

Anei ngā pātai hei whakautu mā koutou:

1. He aha te whakataukī tawhito i hua mai ai te mea hou?
2. He aha ngā whakaaro o te kuia rā mō te pūtakenga o te rū?
3. He aha ngā āhuatanga tou areare o te tangata?

Kia whakarongo tātou ki te whītiki o te kī o Te Iti Kahurangi, o Kahungunu anō hoki, ki a Kingi Kiriona.

He Whakamārama

E whai ake nei tētehi whakamahinga o te kupu ‘reira’ i tīpakohia i te kōrero a Kīngi i te wāhanga tuatahi o te hōtaka.

1. I **reira** māua e whakawhiti kōrero ana.

Tirohia hoki ēnei tauira e whai ake nei, kia maumahara hoki, ko te kupu ‘reira’ tētehi wāhi kua kōrero kētia.


2. Kei **reira** te wāhi e tū rā te hui. *The place the meeting is being held, is there.*
3. Ko **reira** te wāhi i tū ai te hui. *That’s the place the meeting was held at.*
4. Hei **reira** te hui tū ai āpōpō. *The meeting will be held there tomorrow.*
5. Ki **reira** tāua tūtaki ai ā te Rāhina. *Let’s meet there on Monday.*

Anei ētehi hapa e auau ana te rangona hei whakatika mā tātou:

- I reira au whānau ai. ✗ Ko reira te wāhi i whānau ai au. ✓ *That’s the place I was born.*
- I reira au noho ai. ✗ I reira au e noho ana. ✓ I noho au i reira. ✓ *I lived there.*

He Mahi Ī-papa

Whakaotihia te rerenga kōrero kei runga i te Ī-papa:



Hei Mahi

Whakamāoritia ēnei rerenga kōrero e whai ake nei. Whakaurua te kupu ‘reira’ ki ngā rerenga, hei tohu ake kua kōrero kētia te wāhi.

1. That’s where my uncle is lying.
2. We were there talking about work.
3. Let’s meet there at 6 o’clock tomorrow morning.
4. The wedding will be held there on Saturday.
5. That’s the town where I grew up.

Whakautu:

Mahi Ī-papa: I reira ōku mātua e noho ana.

1. Kei reira taku matua kēkē e takoto ana.
2. I reira māua e kōrero ana mō te mahi.
3. Ki reira tātou tūtaki ai ā te ono karaka i te ata āpōpō.
4. Hei reira tū ai te mārena ā te Rāhoroi.
5. Ko reira te taone i tupu ake ai au.